



# SYNOD *Newsletter*

Volume XXXIII

No. 9

E-mail: synodnews@gmail.com

SEPTEMBER, 2018

## LÂWRKHAWM

### SEC VAWI 274-NA

September 6 (Ningani) khân Synod Executive Committee (SEC) vawi 274-na chu Synod Moderator Rev. F. Lalrinnunga kaihhruiain Lloyd Hall-ah an thû.

Tûn tum SEC-ah hian Synod Pay Commission 2018 Report thlîr ho chu thu ngaihtuah pui ber a ni a, siam thât ngai leh belh ngaita sawi a ni a, chûngte siam thât a nih hnuah November SEC-a ngaihtuah nawn leh tûra tih a ni. Vijayanagar Kohran enkawl tûra ruat Pu Rinsânga chu a hna chhuzawm zêl tûra tih a ni a, Hmangaihna In Firms & Society Registration tih remtih a ni bawk. Hêng bâkah hian Bâwngkâwna Synod ram hman dân tûr Synod Trust Committee-in ruahmanna a siam chu thlîr a ni a, Synod Inkhâwmpui leh Kohhran inkhâwmpui chi hrang hrang thlen nâna hman tûra ruahmanna chu pawm a ni.

### CKTP-IN HOSPITAL CHARITY FUND PE

Central Kristian Thalai Pâwl chuan Sept. 5, 2018 (Nilaini) khân Hospital Charity Fund atân chêng nuai nga chu Synod Hospital, Durtlângah an pe. 57<sup>th</sup> KTP General Conference Rorêlah khân Hospital Charity Fund atân hian

Thawhtanni zân inkhâwm thawhlâwm tum khat lâk khâwm ni se, ti-a rêl a ni a. Mizoram hmun hrang hranga KTP Branch ten Charity Fund atâna zan khat thawhlâwm an lâk khâwm atâng hian a thawh khat nân Sept. 5, 2018, Nilaini chawhnu khân chêng nuai nga chu Synod Hospital thuneitute hnênah an hlân.

### BORAL

August 31, 2018 zing dâr 4:00 khân Pu Zorema (David Royce Edwards) kum 83 chu Emral House Nursing Home, Wrexham kuaah Vascular Dementia natna avangin a thi.

Pu Zorema hi Presbyterian Church of Wales missionary Rev David Edwards (Pu Edward-a) fapa a ni a, Mizorama missionary fa piang hmasa ber a nih bâkah a nupui Zosiami nân hian Mizorama Welsh missionary fate innei awm chhun an ni.

## MIZORAM PRESBYTERIAN KOHHRANIN INTHLAN THUCHAH A CHHUAH

Mizoram Presbyterian Kohhran Synod chuan Member of Legislative Assembly (MLA) thlan kuma a lo tih thîn angin 'Inthlan chungchânga Mizoram Presbyterian Kohhran Thuchah, 2018' a chhuah leh ta a, he Thuchah hi kohhran tinah thawn a ni a, in tina sem tûra ruahman a ni bawk. Synod Secretary Upa R. Dêngzikpuia chuan he Thuchah hi "Kohhran inkhâwmah a tam thei ang chhiar chhuak tûr leh kohhran in tinah thuchah hi lo sem tûrin kan inngên a, in lo tihhlawhtlin theih chuan a lâwmawm hle ang," tiin kohhran tin Secretary hnênah lehkhâ a thawn a ni. He Inthlan Thuchahah hian Synod Moderator Rev. F. Lalrinnunga leh Synod Secretary-te hian hming an ziak a, hetiang hian thu hlâwm (point) lian pangaah thenin thuchah chu siam a ni:

### 1. Thlan tûr (candidate) chungchâng

Ram hruaitu thâ kan neih theih nân Political Party tinin candidate an siam laiin a hnuai sawi ang mite hi an candidate atân ruat thei ngei se a lâwmawm ngawt ang:

- (1) Pathian ãih mi, Kohhran leh pâwl tâna mi rinawm.
- (2) Mî dik leh rinawm, kut tling lova sum leh thil dang lâk luh duh lo.
- (3) Mî ze nghet, rilru puitling, sum leh chanvoa lei theih loh.
- (4) Ruih theih thil laka fihlîm mi.
- (5) Mîpat hmeichhiatna kawnga dem kai lo.
- (6) Ram leh hnam dân pawisa mi.
- (7) Khawtlâng leh ram hmasâwnna duh mi leh chutianga inhmang peih mi.

### 2. Inthlan campaign chungchâng

Inthlanna chuhtu (candidate)-te leh an thawhpuiten campaign laiin a hnuai sawite hi zawm ngei tûra beisei an ni :

- (1) Thu belh chian dawl lo leh finfiah theih loh hmanga mipui bum zâwnga thusawi leh theh darh chin loh.
- (2) Intihmingchhiat tum vanga dawta mi mal leh pawl sawi chhiat vak vak chin loh.
- (3) Inhuat leh intai te, invau leh inrikrâp-te tih loh.
- (4) Naupang kum tling lote campaign nâna hman loh.
- (5) Mahni nihna leh thil tumte (manifesto) dik taka sawi mai.
- (6) Pathian ãiha nungchang mawi leh duhawm tak tihlân zel.
- (7) Mizo tlawmngaihna leh hawihhâwmna tihlân zel.
- (8) A taka tih theih loh leh thleng thei lo

tûr insawi hmuh loh leh intiam loh.

- (9) In tina lût zâwnga campaign lova vântlâng zinga campaign mai.
- (10) Mahni tân pawha phur rit tling khawp, tlin duh avanga intiamkam loh.
- (11) Kan ram leh hnam inpumkhatna tichhe thei laka fimkhur, entir nân - chi bing leh area bik chauh huapa inzirtir loh.
- (12) Hel Pâwl leh hriam lek thei pâwl chakna ringa campaign loh.

### 3. Inthlan campaign sêno

India sawrkâr hian MLA thlan dâwna campaign sêno atân Rs 20,00,000 (chêng nuai sawmnhîh) thleng a bituk a. Inthlan campaign-naa sum sên tam lutuk hian nghawng thâ lo tak a thlen thei a, chûng zinga thenkhatte chu :

- (1) A tling lote tân rulh leh harsa khawpa lei batna a ni.
- (2) A tlingte tân inthlan laia sêno khuh leh nâna mipui chanvo tûr hui rûk duhna a thlen thîn.
- (3) Mî hausa leh rethei inkâr tihkak zauna a ni thei.
- (4) Kut tling lova sum lâk duhna leh hlemhlêtna chi mipui rilrua tuhna bul a ni.

Chuvângin -

- (a) Mî mal, pawlho leh Kohhrante pawhin inthlan denchhena candidate leh an thawhpuite hnêna thil dîl hi tih loh tawp tûr a ni.
- (b) Candidate-te chu sum hman dâna fimkhur tûr te, pawisa leh thil dang hmanga vote lei lo tûr te, pâwl leh kohhranin inthlan denchhena thil an dîlte hnar ngam

# SYNOD Newsletter

EDITORIAL STAFF

Rev. Dr. C. Chawngmingliana  
Rev. PC Pachhûnga  
Upa H. Ronghâka  
Rev. R. Laldinthara

## Editorial

### TIH THEIH TAWK TI

Mi tin mai hian theih tâwk leh phâk tâwk kan nei theuh va. Kan theih tâwk leh phâk tâwk erawh chu a inchen lo thluah mai. Hriak rintui to tak sawh keha, Isua lu chung a leihtu hmeichhia kha Isua zirtirte khân an lo sawisêl a. Isua erawh chuan a fak hlahu thung. A chhan chu a tih theih tâwk Isua tân a tih vâng a ni. Kha hriak rintui kha duli 300 man vêl a ni a. Mi Hausa tân chuan eng tham mah a ni lo vang. Mari te unau thum tân erawh chuan thil hlu tham fê zawng a ni ngei ang. Chu vâng chuan a zirtirten an han sawisêl pawh khân Isua chuan an chhûngkaw dinhmun hriatthiampuiin engtin mah ti lo tûr leh a tih theih tâwk a ti kha thil tha tak Isua tân a ti a nih thu a sawi ta hlahu zâwk a nih kha.

Thil eng pawh ti ila, eng kawng pawh zawh ila, eng hna pawh thawk ila, theih tâwp chhuah leh tih theih ang tâwk tih hi a pawimawh tak zet a ni. Theih tâwp chhuaha tih theih tâwk ti thîn mite hi an hlawhtling nge nge thîn. Chutiang mi chu a tirah hlawhtling nghâl mai lo mah se, hlawhtlin hun an nei leh nge nge thîn. 'Ka ti thei lo' ti nghâl ngawt chi hi an hlawhchham châwk. Chutih laiin 'ka bei ang' ti mai zêl chi hi chuan an bei a, hlawhtlin hun a lo inher chhuak leh mai thîn.

Theih tâwp chhuaha tih theih ang tâwk tih hi Lal Isua lâwm zâwng tak a ni tih kan hre thei. Mi hausate a pâwng a takin a dem ngawt ngai lo, mi rethei pawh a pâwng a takin a fak ngawt ngai bawh hek lo. Anmahni dinhmun theuh zêlah an tih theih tâwk an ti em tih erawh chu a ngai pawimawh hle. Hmeithai rethei takin dâr tangka dere chauh thawhlâwma a thawh pawh khân 'hei hian a thawh tam ber' a tih chhan pawh kha eng dang vâng ni lovin a tih theih tâwk a tih vâng chauh niin a lang. Mi Hausa tân chuan dâr tangka dere chu eng tham a ni lo. Hmeithai rethei tak tân chuan 'a neih chhun, a intunnunna' hial tling a nih avângin a fak mai zâwk a ni.

Phêk 1-na zawm...

tûr leh chaw ei khâwm leh ruai buatsaih lo tûrin kan ngên a ni.

#### 4. Thlangtu mipui tân

Ram hruaitute hi mipuiin kan thlan chhuahte an nih avângin ram hruaitu that leh that lovah mipuiin mawh kan phur a. Tûn tum MLA inthlan lo awm tûr hi kohhran leh kan ram tân a pawimawh hle dâwn a, chuvângin, inthlan dâwnin a hnuai sawite hi ngun taka ngaihtuah tûr a ni:

- (1) Vote neite chuan vote thlâk hi ram leh hnama kan chanvo leh kan mawhphurhna a ni tih hriain vote thlâk ngei tûr a ni.
- (2) Ram tâna mi tha ber tûr nia kan hriatte thlang thei lo khawpin party ruihchil lo ila. Mahni chhia leh tha hriatna zalên taka hmangin mi tha leh tling ngei nia kan hriatte chauh i thlang theuh ang u.
- (3) Sum leh pai laka vote lei tumtute lakah fimkhur ila. Chutianga sum hmang duhte chu mi tha lo an ni tih hriain i hnâwl ngam ang u.
- (4) Candidate-te uluk taka thlirin an sum lâk luh phû lova khawsak sâng leh in leh lo nei thate, hmun lo ram ngahte hi mi duhâm leh pamham zia a nih avângin ram hruaitu tlâk an ni lo tih i hria ang u.

- (5) Candidate leh party rullh leh tûra dâwra thil lo lâkte hi chin miah loh tûr a ni.
- (6) Mi mal leh khawtlâng zalênna dâl zâwng mi vau ching te, mi tihthaih ching te leh mi dang sawi che vak vak thînte hi chu ram hruaitu tlâk an ni lo tih hriain i thlang lo ang u.
- (7) Kum tling lo vote neihtir te, vote thlâk nawn te, mi dang hminga vote thlâk te leh inthlan tihchingpen te hi thil sual lian tak, Pathian ringtute tih hauh loh tûr a ni tih hre reng ang u.
- (8) Zâwl thupuan leh aien lam thil hmang duhtute hian Pathian an ring lo tih hriain i pawm lo ngam ang u.
- (9) Kan rama inthlanna thianghlim leh felfai nei tûr leh rorêlna dik a awm theihna tûrin Mizoram People Forum (MPF) hmalâkna hi mipuiten jawiawma thlâwp tlat tûrin kan inngên bawh a ni.

#### 5. Tawngtâina

Pathian ringtute tân chuan tawngtâina hi kan hmanraw pui ber pakhat a nih avângin inthlanpui lo awm tûr atân hian nasa takin i tawngtâi ang u. Pastor Bial leh kohhran tinte inthlanpui puala tawngtâina hun mumal taka ruahman tûr leh tawngtâi inkhâwmahte thupuaia nei thîn tûrin kan inngên a ni.

### BEIHRUAL KUM 100-NA CHAMPAPHÂK A THLENG

Kumin 2018 Beihruual hi Beihruual kum 100 tlin champaphâk a nih avângin Mizoram Presbyterian Kohhran Synod Inkhâwmpui thu angin Synod Executive Committee leh Synod Officer's Meeting (OM) chuan Beihruual Centenary puala hun bik hman dân tûr a duang a, hetiang hian:

1. Beihruual tan zânah Beihruual Centenary puala lâwm thu sawi tawngtâina hun hman ni se. Hemi zâna chhiar chhuah tûrin Beihruual chanchin ziah ni se.
2. Chhûngkaw tin tlawh chhuak zâwng hma lâk ni se. Ni tin chhûng inkhâwm nei tûr leh sâwma pakhat pe tûra tan lâk te, Pathian biak inkhâwm ngai pawimawh tûra tan lâk te, min nêktu boruak hrang hrang - politics chungchâng te, kohhran ngaih pawimawh etc. inzirtirna neih ni se.
3. A ti thei chuan Bial leh Kohhranah Street Preaching neih ni se.
4. Kristian chhûngkaw ni chawhnu inkhâwm hi kohhran member inkhâwm kim hrâm tûra tan lâk ni se.
5. Beihruual Centenary lawmna ruai/thingpui ruai mahni kohhran theuhah a thei chuan mahni remchân hunah kohhran tinin buatsaih ni se.
6. Synod-in Beihruual Centenary hriat

rengna (tablet) siam se, kohhran tinin, a thei chuan mahni kohhranah thiam angin Beihruual Centenary hriat rengna siam ni bawh se.

7. Beihruual thupui 2018 awm sa hi hlâwkpui ngei tûra hman theuh ni se. (Synod 2016:9; SEC 267:9; OM 5:40, 6:14, 9:31. Appdx. 6)

He ruahmanna zui hian tualchhûng kohhran tam ber chuan hun hman dân tûr an duang a, kumin 2018 Beihruual chu kum dang aia uar zâwkin an hmang.

Beihruual Centenary pual hian Mizoram Presbyterian Kohhran Synod chuan lung chang (granite)-ah hriat rengna thu ziak a siam a, chu thu ziak chu Synod Executive Committee (Special) thut ni, September 6, 2018 khân Synod Moderator Rev. F. Lalrinnungan J.M. Lloyd Hall-ah a hawng.

Kum 1918-ah Champhai Hmunhmêl-tha khuaa Presbytery Inkhâwmpui chuan, kum tin September thlaa Beihruual neih an rêt thlu a. Chuta chin chu tûn thlengin tha takin a kal zêl a. Kumin 2018 hi a kum zâna a ni ta hial a ni.

Beihruual hman dân chu hun kal zêlah a inang vek lo. A tir lamah chuan thla chawhma lam hi ringtute intihchak nân Biak Inah zan tin an inkhâwm thîn a, thla

Phêk 3-na dînglamah zawm...

# Râl Vêngtu

Râl Vêngtu râl vênbùkah chuan vêng hrang hrang ațangin rawngbâwltu thenkhatte chu an lo kal khâwm a. Beihrial an hman dânte an an sawi khâwm nak nak a. Thenkhat chuan, “Keini kohhran chu Biak Inah zan tin kohhran pum huapin Beihrial kan hmang a, kan hlîm viau mai,” an ti a. Thenkhat chuan Kohhran inkhâwm hun pangngai chauh Biak Inah an hman thu leh kohhran inkhâwm hun pangngai bāk zawng chu Upa Bial tinah in hrang hrangah an inkhâwm chhâwk thu an sawi a. Thenkhat chuan thla chanve chhûng Camping nân leh a bāk zawng Biak Ina hun an hman tûr thu an sawi baw a. Thenkhat leh chuan Thawhtan zân chu KTP pualin hun an hman thu te, Thawhleleh zânah Kohhran Hmeichhe pual, Ninga zân Kohhran Pavalai Pâwl pual, Zirtâwp zân chu chhûngkaw tinin mahni inah, a bāk zawng chu Kohhran Program pangngaiin Biak Inah Beihrial an hman thu te an sawi nak nak a. Râl Vêngtu chuan a inlêngte ti ti chu ngun takin a lo ngaithla kiau va.

Râl Vêngtu chuan, “Chu! In Beihrial hmang chu Beihrial pawh a va ang lo ve,” a lo ti khauh va. A inlêngte chuan, “Eng vângin maw Beihrial kan an loh, eng nge ni-a min hriat?” an ti a. Râl Vêngtu chuan, “Beihrial ni lovin Beihrang in nih zâwk mah chu. ‘Mahni seh seh mual hranah’ ti te pawh in ang rum rum e a! Beihrial ai mahin inthawh chhâwk te pawh in ang rum rum e. ‘Mama, nang waviinah va feh la, naktûkah Mami va feh ve thung sela, naktûk tûk lehah i nu, a tûk lehah kei ka va feh ve thung dawn nia,’ tih ang vêt niin ka hria. Chutianga inthawh chhâwk chuan buh thar chhuah tam a har teh asin. Inthawh chhâwk lova, ni tin feh ho dual dual hian hna a sâwt ber zâwk a, thar pawh an thar tam zâwk asin. Mizo Kristian hmasaten Beihrial an hman tirh lam kha chuan a huhovin an thawk dual dual a, hna pawh a sâwt a. Kristian pawh an pung chakin, ringtu hnungtawlh tam tak pawh an lo chak thar leh ta a nih kha. Chu chu a hlâwk êm avângin Beihrial chu chhunzawm zêl tûr tiin an rêl ta a nih kha!” a ti ta duah mai a. A inlêngte chuan, “Aw! Râl Vêngtu tak hi zawng a, kan rin loh lamah min dèk leh thut thîn. I han sawi tâkah chuan a ni mai âwm tak e a, kan Beihrial dân chu inen lêt deuh chu a ngai a nih dâwn tak hi a,” tiin Râl Vêngtu chu an hawsan leh ta rih a.

## SYNOD HOSPITAL, DURTLÂNG JULY, 2018 CHHÛNGA THILPÊK DAWNTE

**I. CHARITY FUND**

1. Tungvêl Gate Vêng Kohhran	Rs	4,000/-
2. Kolasib Vênglai Kohhran Pavalai Pawl	Rs	4,000/-
3. Kolasib Vênglai Kohhran	Rs	10,000/-
4. Upa H.S Lalhimpua, Sihphîr Vêngpui	Rs	3,000/-
5. Upa C.L Biakhluva, Tungvêl Gate Vêng	Rs	2,000/-
6. Zaitte Pastor Bial Kohhran Hmeichhia	Rs	3,000/-
7. West Phailêng Electric Vêng Kohhran	Rs	1,000/-
8. West Phailêng Kanân Vêng Kohhran	Rs	1,000/-
9. West Phailêng Chhim Vêng Kohhran	Rs	5,000/-
10. Republic Vêng Pastor Bial, Aizawl	Rs	1,47,500/-
11. NHIDLL Branch Office, Aizawl	Rs	5,000/-
12. KTP, Tiângpui Branch	Rs	3,000/-
13. Thuampui Vêng Koh. Hmeichhia, Aizawl	Rs	3,000/-
14. Kâwlkuh Pastor Bial Koh. Hmeichhia	Rs	5,000/-
15. F. Lalhira, Dâwpui Vêngthar	Rs	500/-
16. R. Vânlhriata, Vêngnuai, Aizawl	Rs	2,000/-
17. NE Khawungsei Kohhran	Rs	10,000/-
18. Lungdai Kohhran	Rs	1,000/-
19. Pu Lalsânglôra, Durtlâng Mêl - 5	Rs	1,000/-
20. Bawrai Kohhran, Zâwluam Pastor Bial	Rs	1,000/-
21. Thuampui Pastor Bial	Rs	8,997/-
22. Zemabâwk Vêngthar Kohhran Hmeichhia	Rs	5,000/-
23. Zoramawii, Zârkawt	Rs	3,500/-
24. Zohlimpui, Zârkawt	Rs	3,500/-
25. Zodinliana, Mission Vêng	Rs	1,300/-
26. Lungdai Kohhran	Rs	1,000/-
27. KTP, East Phailêng Pastor Bial	Rs	2,010/-
28. KTP, Zaitte Branch	Rs	1,500/-
29. Vânlhriata, Khatla South	Rs	10,000/-
30. KTP, Hmuntha Pastor Bial	Rs	3,000/-
31. Sacrament Department, Phûllên Kohhran	Rs	500/-
32. Pu B. Lazêla & Family, Vênghlui, Aizawl	Rs	20,000/-
33. Ramhlun Vêngthar Pastor Bial Kohhran Hmeichhia	Rs	20,000/-

**II. THISEN PETE**

1. KTP, Dâwpui Vêngthar West Branch	18
2. YMA, Tuikhuahthlâng Branch, Aizawl	36
3. KTP, Bethlehem Vênglai Branch	62
4. KTP, Dinthar Vêngthlang Branch	30

**III. GRACE HOME TÂN**

1. Electric Vêng Pastor Bial Kohhran Hmeichhia, Aizawl	Khum 2
2. Durtlâng Pastor Bial Kohhran Hmeichhia	Rs 10,000/-
3. BSI, Aizawl Auxiliary Mary Jones Women's Fellowship	Rs 10,000/-

**IV. THIL DANG PETE**

1. YMA, Zârkawt Branch	Mitthi khuhna puan 100 min pe
2. C. Vânlalhûma, Mumbai; Gospel Ramdinmawia, Chawnpui; Zosangliana, Mission Vêngthlang; Dr. Angela Laldinpui, Chaitlang; Dr. Lalthanliana Ngente, Chanmari 'W'; Dr. Francis K. Lalhmangaiha, Bethlehem	West Phaileng Mobile Clinic-a Pap Smear lâkna man Rs 6,000/-
3. Mizoram Upa Pawl, Durtlang Unit	Thuthlengsei 3 (3 Seater) & Cushion Physiotherapy tân Steel Almira 1 min pe Nursing School Hostel
4. KTP, Vaivakâwn Pastor Bial	Khum siam nân Rs 17,000/- Eye Unit tân Autorefracto Keratometer lei nân Rs 4,00,000/- min pe
5. Leitan Pastor Bial Kohhran Hmeichhia	Eye Camp tân Tarmit dum 120 min pe Rs 3,000/- min pe
6. Leitan Pastor Bial	Gynae Ward LCB tân Table Fan 1
7. Pu KC Kapthianga, Hospital Campus	Mitthi khuhna puan 40 min pe Computer Set 1 leh Nebuliser, Naupang Ward tân min pe
8. Bîlkhawthlîr Kohhran Pavalai Pawl	Hmunphiah 50 min pe
9. Pu Lalduhawma, H/o Lalzampui Kiangte, Chanmari, Aizawl	Vein Visualizer lei nân Rs. 12,000/- min pe
10. YMA, Hunthar Branch	Rs. 20,000/-
11. Zothan Drug Store Chanmari, Aizawl	Rs 1,50,000/-
12. Durtlâng Pastor Bial	Rs. 1,000/-
13. Thingsûl Tiângnuam Kohhran	
14. KTP, Bâwngkâwn Pastor Bial	
15. Vaivakâwn Pastor Bial Koh. Hmeichhia	
16. Tuikual Pastor Bial	
17. Pu Roliana Chenkul, Durtlang Mel-5	

**VI. PAWISA DAWN ZAWNG ZAWNG -**

I. Rs	2,93,307/-
II. Rs	20,000/-
III. Rs.	6,29,000/-
<b>Total</b>	<b>Rs 9,42,307/-</b>

Khawngaihna leh duhsaknaa thilpêk min petute zawng zawng hnênah Lalpa Isua Krista hmingin lâwmthu kan sawi tak meuh a ni. Heng in thilpêk kan dawnte hian dam lo awm man harsate thiamuang takin a awmtir a, Hospital mamawh tam tak min phurhûksak baw a ni.

Sd/-  
(REV. R. RAMDINMAWIA)  
Chaplain, Synod Hospital, Durtlâng.

**Phêk 2-na ami zawm...**

chawhnu lam chu ring lote beih nân an hmang thîn. Ring lote inah lêngin Pathian thu an sawipui a, khawlaiah te thu sawiin mual inkhâwm te an nei a, Kohhranin a chak phahin a pun phah hle thîn. A lo rei a, ring lote an tlem hnuah chuan Kohhran intihchak nân leh Kohhran chhûnga mi chak lo leh hnungtawlh te dâwm chhuah nân an hmang a, vêng hrang hrangah inthen darhin, vêng inkhâwm te an buatsaih a, ring lo mi la awm tamnaah chuan chûngho beihna chu a kal zêl baw.

A lo rei deuh chuan ram pum huapa zir tlân tûr thupui te siam a ni a, thupuih hian Thuthlung Thar ațanga lâk chhuah thupui chi hrang hrang te, Kristian nun lam khawih thupui chi hrang hrang leh thupui dangte pawh zir a ni a. Chhûngkaw Hapta hi 1956-ah hman ni mah se; chhunzawm a ni lo va, 1979

ațangin kum tin hman zui a ni ta a. Ramthar lam hawi thupui hi 1963-ah zir a ni a; mahse Ramthar Hapta hman chhunzawm tâk zel hi chu 1978 ațangin a ni. Bible aț anga lâk chhuah thupui chi hrang thahnem tak zir a ni tawh a, a bākah thupui dang deuh - Kohhran Thunon dân, Kristiante leh politics, Finance Campaign, Zû leh Drugs, Media hmanga rawngbâwlina, thilsiamte humhalh, Secular Education leh Mizoram Synod tih te pawh zir a lo ni tawh a ni.





## SAWMNA

**DÂWRPUI KOHHRAN** chuan kum 100 (Centenary) a tlin lawmna hun ni 21-28 October, 2018 chhúng hian a hmang dawn a. Ni 21.10.2018 (Pathianni) dâr 10:00-ah Synod Moderator-in Biak In thar a hawng ang a; tin, ni 27.10.2018 (Inrinni) ah Centenary ruai buatsaih a ni baw ang. He hun hmang tûr hian Dâwrpui Kohhrana lo lawi tawh zawng zawngte an sâwm a ni.

## PRAISE ON 2018 ORGANISING COMMITTEE AN THU

Sept. 5, 2018 (Nilaini) khân Synfo Praise On 2018 Organising Committee chu Synod Committee Room No.1-ah Chairman Upa Zonunmawia kaihhruiain an thu khâwm.

Praise On 2018 atâna hmalâknate thlir hovin ruahmanna hrang hrang an siam zui baw. Organising Committee thut khâwm ni thleng hian intihsiaknaa tel tûr Branch hrang hrang aţangin 40 vêlin hming an pe tawh a ni. Synfo Praise On 2018 Intihsiakna hi Mission Vêng Kohhran Hall-ah neih a ni dawn a. September 18-21 chhúngin Round 1 neih a ni ang a, October 16-19 chhúngin Round 2, November 6-9 chhúngin Round 3 leh Final round neih a ni ang. Praise On 2018 hlanna inkhâwm hi September 14 (Zirtâwpni) zân dar 8:45-ah Mission Vêng Kohhran Hall-ah hman a ni dawn a, Synod Moderator Rev. F. Lalrinnungan a hlân ang a, Judge tûrte puang chhuakin hmêlhrattîr an ni ang a, Mizoram Synod Choir, Praise On 2017-a lâwmman pathumna latu Dâwrpui Vêngthar Group leh Praise On 2016 House Band te an zai ang.



## KOHHRAN PAVALAI PÂWL INKAIHHRUAINA BU

**Kohhran Pavalai Pâwl Inkaihhruaina Bu** a chhuak a. Office hun chhúngin Revival Department, Synod Office-a bu khat ₹10-in a lei theih e.

## KOHHRAN INPUMKHATNA LEH THAWH HONA SEMINAR

September 27, 2018 (Ningani) nilêng khian Lunglei, Sêrchhîp, Champhai, Kolasib leh Mamitah te kohhran inpumkhatna leh thawh hona seminar thawh hnihna buatsaih a ni dawn a. Synod Puipate zinga mi pakhatin ho zêlin, hmun thenkhatah hruaituah an awm ang a, hmun thenkhatah chuan paper chhiartu an ni thung ang. Kohhran tin aiawh te, Pastor, Pro. Pastor leh Minister-te he Seminar-a tel tûr hian sâwm an ni.

**Zone I**-ah Lunglei District, Lawngtlai District leh Siaha District huam chhúnga miten Lunglei Chanmari Kohhran Hall-ah Seminar an hmang ang a, Rev. R.C. Lalngkhâkiana, Adm. Secretary-in kaihruaiin Synod Fin. Officer Rev. H. Remthangan paper a chhiar ang. **Zone II**-ah Sêrchhîp District awmin Serchhîp Kâwnpui Kohhran Hall-ah Synod Moderator, Rev. F. Lalrinnungan a hruai ang a, Rev. Dr. H. Vanlalauvan paper a chhiar ang. **Zone III**-ah Champhai District awmin Champhai Vêngthlang Kohhran Hall-ah Seminar hman a ni ang a, Synod Statistician Rev. R. Lalnunluangan a hruai ang a, Rev. Dr. H.

Lalrinthanga, Associate Professor, ATC-in paper a chhiar ang. **Zone IV**-ah Kolasib District awmin Kolasib Diakkâwn Kohhran Hall-ah Seminar hman a ni ang a, Rev. P.C. Pachhúnga, Executive Secretary-in hruaiin Rev. Vanlalrova Khiangte, Principal, MTC-in paper a chhiar ang. **Zone V** chu Mamit District niin Mamit Kohhran Hall-ah Seminar hman a ni ang a, Synod Secretary Upa R. Dêngzikpuian kaihruaiin Rev. Dr. B. Lalnunzira, Asst. Professor, ATC-in paper a chhiar thung ang. Seminar-a kalte hi Synod-in T.A/D.A a pe ang a, thingpui leh a hmeh chu a thlengtu kohhranin an tum theih beisei a ni.

## PBS FAREWELL &amp; DEDICATION VAWI 43-NA

August 23, 2018 (Ningani) chawhnu dâr 1 khân Presbyterian Bible School (PBS) Batch 43-na te chuan Synod Conference Centre-ah Farewell & Dedication programme an hmang. Programme hi Synod Moderator Rev. F. Lalrinnunga'n kaihruaiin hunserh a hmang a, Subject 3 – Christian Theology, Church Administration leh PCI Constitution-a marks hmu sâng berte hnênah Pu C. Awithanga Award pawisa fai Rs.1,000/- theuh hlan an ni.

## A THLÂWNA MIT ENTÎR THEIH HUN

Synod Hospital, Durtlâng chuan October 12, 2018 (Ningani) khian World Sight Day denchhenin Synod Hospital, Durtlângah leh Dr. Fraser's Clinic, Mission Vêngah a thlâwna mit entîrna (Free consultation eye check up) a buatsaih dawn a. Mit lama harsatna nei mi tu pawh hemi ni dâr 9:00 a.m. – 3:00 p.m. chhúngin Synod Hospital doctor (eye specialist)-ten en man la lovin an mit an ensak thei ang.

Sd/-  
Dr. LH Singson  
Director, Synod Hospital

## PASTOR NUPUIE HRIATTÎRNA

Mizoram Synod Pastor Nupuite Intawhkhâwm, kum tina kan neih thîn chu October 18, 2018 (Ningani) khian neih leh tûr a ni a. He hunah hian Pastor/Pro Pastor nupui zawng zawngte chu tel ngei tûrin kan insâwm a ni. Hlim taka hun hmang tûrin i inbuatsaih theuh ang u.

Sd/-  
Lalroluahi  
Secretary